

Segun Ministro Tico Croes:

Departamento di Finanzas ta cera aña 1998 cu diez Miyon den caha

ORANJESTAD (AAN): Ministerio di Finanzas ta haciendo un tremendo trabao. Pronto di cuater pakete di ahustacion pa sigui sanea situacion financiero y elimina tur debe y atrasonan.

Dia 31 di december di aña 1998 tabatin 9.539,867 Florin den caha di pais Aruba. Esaki kier men cu durante lunanan di november y december por a cumpli cu tur obligacion di pago (APFA, creditornan local, etc.) cu excepcion di pagonan na fondo di garantia y sinking fund, ya cu Minister di Finanzas Tico Croes a pone un stop riba esaki. Asina departamento di treasury di Directie Financiën a informa.

E siguiente informacion ta basa riba datonan di administracion di Directie Financiën. Ta claro cu e aña financiero no por worde cera definitivamente ainda ya cu factura

por drenta ainda. Basa riba datonan mas recien, aki un par di luna lo por entrega un cuenta anual di concepto na Centrale Accountantdienst pa worde controla. E siguiente paso ta pa entrega un cuenta anual na Algemene Rekenkamer. Despues di esey lo por sera e aña financiero definitivamente.

Elimina debenan: A paga 22 miyon na bono di APFA y 13,7 na bono di Hulanda. A paga tur debe di ATA, esta 9 miyon Florin, y a crea un fondo di 15 miyon Florin pa campaña di propaganda den exterior. E suma aki mester worde añadi te 18 miyon e luna aki.

Durante e seis luna cu Tico Croes ta Minister di Finanzas y a introduci cierto ahustacion y cambianan den maneho financiero, por a ripara hopi resultado positivo. Na comienso di juli 1998 e saldo den caha tabata 5,73 miyon Florin, a sera e aña cu un saldo di 9,53 miyon, conforme e nota di maneho di



Minister Tico Croes.

Pa loko ta trata e debenan di gobierno por anota un rebaho. Na luna di juli debe na APFA tabata 46,3 miyon, esey a baha cu tres miyon pa 43,5 miyon. Mirando cu tambe a paga 22 miyon di bono na APFA por bisa cu e situacion aki ta bao control, segun treasurer di Directie Financiën, Edward Erasmus. Na creditornan di exterior a paga 5 miyon y a baha e debe di 22,3 miyon pa 17,3 miyon. Hopi creditornan local tambe por a cobra. E debe di 24 miyon a baha te 13,9 miyon, dus por conclui cu gobierno ta na

bon caminda pa cumpli cu su meta pa elimina tur e debenan aki mas pronto posibel.

Riba e post 'overigen' tabatin un suma habri di 18,4 miyon, esey a baha te 14,4 miyon Florin. Esaki ta ensera debenan na instancianan particular y di gobierno.

Si nos mira e situacion na comienso di luna di november 98, e debenan di gobierno tabata 171 miyon. Dia 31 di december e suma aki a baha

pa 150 miyon. Segun Directie Financiën ta asina cu si maneho financiero no a worde ahusta y si no a cuminsa cu pago y aflossing e debenan aki lo a subi te 220 miyon. Asina por conclui cu Ministerio di Finanzas ta haciendo un tremendo trabao. E luna aki lo delibera riba un di tres y cuater pakete di ahustacion pa asina sigui sanea situacion financiero y elimina tur debe y atrasonan.

STEWARDESSNAN DISGUSTA CU HOTEL NA CARACAS

ORANJESTAD (AAN): Informacion cu DIARIO a ricibi ta indica cu algun stewardess di e aerolinea local no ta gustando at all e hotel cu nan ta keda drumi aden, ora cu nan viaha pa Caracas.

Parce cu e Hotel ta situa den Litoral, cerca di Aeropuerto, y den oranan di anochi e ta un

area masha peligroso mes. Henter anochi bo ta tende tiroteo ta bin for di tur skina, y esaki ta trahando riba nervio di e stewardessnan.

Nan speranza ta cu gerencia di e aerolinea local lo check si acaso por localiza un otro Hotel unda e peligro ta menos, compara cu esun actual.

Turista fresco a pasa damita un wanta

ORANJESTAD (AAN): Awor a para bira cu ta normal si un persona no haya su gusto, e ta djis hisa man. Esey ta loko un damita di un Carrental mester a soporta na man di un turista Mericano.

Segun informe cu e damita di inicial R.K cu ta emplea na un Carrental, a haya bishita di un turista tabata kier a huur un auto. Pa esaki socede, ta claro cu e turista mester di algun requisito.

E turista cu ta riba un barco crusero no a gusta y a start un discusion. E discusion a bay asina e leu cu e turista a dicidi di pasa patras di e toonbank. Y pa colmo el a hisa man y pasa e damita poco wanta.

E damita a denuncia e caso aki na Polis. Patruya a despues di a tuma nota a acudi na e crusero y a papia cu e chief di seguridad. E momento ey e turista no a regresa barco. No ta conoci si Polis a logra di atende e turista aki. Si acaso nan no a logra e caso lo worde pone den man di ministerio publico. Tin un supuesto tratado cu e turista lo mester bay duna cuenta sea na Merca sino e lo tin cu presenta den corte Arubano.

FIANSA DI CALIDAD!!

